



DEO OPTIMO MAX.

UNI ET TRINO;

VIRGINI DEI-PARÆ, ET S. LUÆ,

Orthodoxorum Medicorum Patrono.

QUÆSTIO MEDICO-CHIRURGICA,

QUOD LIBETARIIS DISPUTATIONIBUS,

manè discutienda in Scholis Medicorum, die Jovis decimo-nono  
mensis Martii, Anno Domini M. DCC. L.

M. ANTONIO CASAMAJOR, Censore Regio,  
Doctore Medico, Præsidente.

*An qui Tumores deleri debent, Ferro potius, quàm Causterio potentiali, delendi?*

I.



ROTUBERANT passim in corpore humano Tumores, mole, figurâ, colore, duritie, cæterisque adjunctis adeò dissimiles, ut, licet ad genus aliquod possint ut plurimum revocari, de specierum numero nondum satis constat. Inter eos, complures universalibus modò, modò particularibus remediis, sæpè utriusque, vel ad suppurationem, vel ad resolutionem feliciter perducuntur. Quæ si frustra tentata fuerint, superest, crudele quidem, at non semper rejiciendum præsidium. Ex ipso enim amaritudinis fonte surgit aliquid grati, sanitas nempe, quo dolores possint abundè simul & jucundè pensari. Consistit illud opus in Tumore auferendo, quod instrumento multiplici confici potest. Vel enim funiculis religatus Tumor, aut inermibus digitis prehensus convellitur: vel laqueo paulatim, ab imis radicibus, sic strangulatur, ut spontè post paucos dies decidat. Leniter etiam contorqueri potest ope forcipis, aut ignito ferro comburi. Duo sunt tandem vulgatoris usus, Caustrium, quod aiunt, *Potentiale*, & *Cultellus*, quorum primo Tumores sensim consumuntur, altero, statim rescinduntur. In iis interim abolendis sunt multa, ad quæ nisi sedulo advertatur, opera erit, si non semper exitiosa, saltem aut difficilis, aut parùm fructuosa. Pri-

A

2  
mò igitur quæ tolli debent ea tantummodò, at omninò tamen, tollantur. Cutis, quantum res finit, post factam operationem, integra remaneat. Arteria aut vena insignis, si qua vel incautè, vel necessariò aperta fuerit, conspectum non fugiat. Tendones, nervi, membranæ ne molestè quoquomodo, afficiantur. Quàm brevissimè fieri potest, pars affecta doleat. Ex Cauterio autem & Ferro, alteri præferri debet alterum quod supra memorata valet præstare.

#### I I.

**C**UINAM usui tot, inter operandum, astutiæ si quis scietur, in promptu responso est. Plurima, nempe, simul ex iis exurgere comoda, & arceri pericula. Enimverò si Tumor sic auferatur, ut nihil ex eo superfit, quod recidivæ metum incutiat, aut quoquomodo sit nociturum: nec interea cæterarum partium ulla lædatur quæ servari debent, feliciorem curationem consequuturam esse satis elucescit. Deinde cutem non deleri parvi non est. Hoc pacto potest, intra paucos dies, cum fundo vulneris coalescere. Illud si præstari possit, præcavetur suppuratio, quæ, si nimis copiosa fuerit, debilitatem summam affert, imò lethalem sæpè *marasium*, si suppressa, febrem & inflammationem, si moderata & laudabilis, tardam curationem. Non est tamen diffidendum adeò opportunam quandòque esse suppurationem, ut sæpè, absque noxâ, prohiberi non possit. At nobis satis erit, si, nonnullis in casibus, utiliter prævertatur. His etiam addendum videtur cures, cujus usus ignotus nemini, ubi semel sublata fuerit, arte nullâ posse reparari. Num itaque rem levissimi momenti crederes, quòd, ipsâ deperditâ, cicatrice, in plurimos menses protractâ, veluti precariò, vulnus obducatur? Præterea unum tantum contingere potest, ut reverâ non semel contigerit, arteriæ alicui, scilicet, aut venæ insigni insitum fuisse vulnus. Huic calamitati, promptâ ligaturâ, succurrendum. Sed quânam arte præsens adhibebitur auxilium, nisi instrumenti, inter operandum, delectu, cautum fuerit quominus apertum vas, intra circumfusas carnes, citâ contractione, delitescat. Quòd tendones & nervos spectat, nemo nescit eos sensu exquisitissimo esse donatos, ob eamque rationem faciliè admodum irritari. Levi de causâ dolorificè convelluntur, undè oriuntur tensio maxima, durities, longè circa partem affectam, quandòque abscessus periculosissimi, nisi citiùs delirio, convulsionibus, imò ipsâ gangrænâ supervenientibus, mors accita fuerit. Longioribus tandem doloribus hominem torquere inhumanum est, quem brevioribus sanare possis. Quæ ratio, si cuiquam non arrideat, febrem, vigiliam, virium lapsum, solitas longiorum dolorum comites, consideret.

#### I I I.

**P**LURES sunt Tumorum species, quàm ut singulas possimus describere. Illud tantum monemus, de Tumoribus omnibus hic non agi. Permultî siquidem observantur à quibus non temperare manus nefandum esset, veluti quandò aut nervis, aut tendonibus hærent, aut vasis majoribus, quarum partium summi discriminis foret vulneratio. Nec etiam deleri debent qui, longâ morâ, maximam in molem creverunt, nisi fortè tenui pediculo, quod rarè tamen occurrit, pendeant. Sunt è contrâ quos parùm sapienter intactos relinques. Tales sunt qui pendere nimio, situ inopportuno, partem aliquam valdè gravant, sicque organi alicujus ad vitam necessariî functionem interceptiunt. Non magis ignoscendum est iis à quibus timeri potest ne, lapsu temporis, in immensum augeantur, aut, pejorem induendo naturam, in ulcus mortiferum desinant. Ex hac profapiâ, instar omnium sint *Scirrhus*, *Cancer*, & præterea Tumores nonnulli qui, ratione materiæ quam continent, diversa sortiuntur nomina. Si ea nempe mel referat, *Melicerides*, *Atheromata* si puliculam, si sebaceum quid aut adiposum filamentis membranisque intertextum, *Seatomata* nuncupantur. Hæc solâ ratione differunt. At illud inter se

commune habent quod singulorum materia, plerumque sacculo comprehendatur, qui sacculus nihil videtur esse quàm folliculus adiposus, præter naturam, valde amplius. Hujusmodi verò sacculi quandòque sic indurantur, ut æmulentur coriorum duritie. *Scirrhus* est Tumor inæqualis, durus, renitens, indolens, persæpè in glandulis, prægressâ plerumque inflammatione, nascens. Consistit autem in congerie quâdam abnormi atque intricatissimâ vasorum induratorum, quæ, lymphâ inspissatâ, maximam partem, obturantur. Facile in Cancrum potest migrare, cum, pressione jugi, succis concrecentibus, vasculorum cavum omninò oppletur. Tunc circuitus sanguinis ibi penitus deficit, magis ac magis indurantur vasa, crescit tumor atque exporrigitur in radices quæ ad corneam duritiem assurgunt. Pruritus sentitur molestus, dolorificus. Tandiu se res habet, quamdiu non ulceratus est Cancer. Sed concretus humor tandem expanditur. Quâcumque autem de causâ vehementiori fortè sanguinis impulsu, calorem concipiat, turgescit in parte affectâ tantò majore æstu, quantò violentius compactus fuerit. \* Tunc non simplex dolor urget, sed cruciatus intolerabilis, quasi tractus ignei. Cutis succo rarefcente pressa nigrescit, cruciaturque gangrenâ ac tandem rumpitur. Hiat ulcus fœdum, cum, principibus extorsum versis, sanie tenui, erodente stillans, aspectu horrendum, immedicabile. Cancrî eò usque progressi curatio non debet suscipi, at solummodò, cum, primis initis, sub cute adhuc integrâ, ad digitorum nutum fluctuat, necdum, in partes subjacentes, altas radices egit. Tunc potest deleri sicut & Tumores præmemorati, quibus etiam possunt addi Ficus, Fungus, Polypus aliique quamplurimi. Sed quæcumque in Tumorum ablatione commendavimus, ea maximè Cultello præstari certum est, contraria verò Cauterio invehî.

\* DD. Astruc, de Morb. Venæ.

#### I V.

**Q**UID enim Cultello chirurgico tutius aut commodius? Cauterio quid magis inopportuno intutumve? Cultello, si præsertim manu prudentiæ non experte gubernetur, non aliæ cæduntur partes, quàm quæ cædi debent, omnes verò possunt excidi, quæ sunt excidendæ. Cauterio non item. Vel enim sub pulveris formâ, inspergitur, vel apponitur unguento mixtum, vel aquoso aliquo vehiculo dilutum. Quoquo autem modo usurpetur, ut ut dextrè id fiat, præcaveri nunquàm potest quin hanc vel illam partem, aut acrius, aut moderatius comburat, prout molliorem invenerit aut solidiorem. Hinc quoque, vel indè divagari potest, eaque rodere quæ integra manere debuissent, intacta verò relinquere quæ forent consumenda. Sunt etiam nonnullæ Tumorum partes quarum ne vel minimam superesse multum interest, sacculos puta occallatos, vel ipsas Cancrorum radices. In eas, quoniam nullum ferè habent cum sanguinis circuitu commercium, irrita planè est vis Cauterii. Vossellâ è contrâ, vel digitis prehensâ, Cultelli operâ, levi prorsus negotio, separantur. Deindè præcaveri nunquàm potest quin Cauterio penitus destruat cutis, at Scalpello facile servari potest, siquidem cruciatum, aut quovis alio modo inciditur, extremis digitis postea separantur anguli, vulneris fundo, post sublatum Tumorem, si visum fuerit, aptandi. Tertiò si vel ob nimiam in operando celeritatem, imperitiam, vel *analem* vasorum, quam vaticinari fas non est, distributionem, arteria aut vena non spernendæ magnitudinis aperta fuerit, illicò, nihilo obstante, ligari potest. Scalpello enim incisa, statim apparet, nec antè crispatur quàm possit filo constringi, imò, sanguine ubertim erumpente, statim ipsa se prodit. At multò lentius cum Cauterio proceditur, quod, ut possit agere, per tempus aliquod sinendum est. Interea si quod vas erosum fuerit, molestè vellicatum, in carnes morâ non mediocriter juvante, reconditur. Ferro tandem. (modò cæsim, non verò punctum id fiat) multò minori periculo, quàm Caustico, tendones, nervi, membranz vulnerantur, quæ tutò & quandòque datâ operâ omninò refecantur. Ex

4

Cautistici autem molesto & dolorifico morfu funestissima, qualia jam diximus, cientur symptomata.

V.

**E**X eo quod læsa Cautistico arteria statim stringatur, atque retrahatur in carnes, verum est cohiberi sanguinem, sed ad breve tempus. Nam ubi primum remissit altringens Cauterii vis, sanguis eò majori pertinaciâ effluit, quò deligandæ arteriæ non ampliùs detur occasio. Facile tamen concesserimus, per Cauterium, minimis saltem in vasculis, subitanæ & durabilem esse sanguinis cohibitionem. sed exindè Cultri utilitas magis elucet; siquidem ex vulnere, per ipsum inflicto, manat sanguinis sufficiens quantitas, quâ prævertitur inflammatio, quæ semper, appposito Cautistico, nimia consequi solet, ob id imprimis, quòd sanguis nullus effluerit. Frustrâ quoque opposuerit aliquis dolorem esse mitiorem ex Cautistico, quàm ex Cultero. Illud accidit solum quibusdam in Tumoribus, Fungis forsitan qui naturâ suâ parùm sentiunt. Sed cæteris in casibus, præterquamquòd non minis molesta sunt Cautistica quàm Ferrum, id habent insuper incommodi, quòd unicâ vice, quemadmodum Culter, Tumores, maximè molis amplioris, delere non valeant. Sed multoties apponi debent, quâ quidem repetitâ appositione, dolores jam sævitiâ æquales, multò diuturniores evadunt. Ad hæc frequentiore Cautisticorum usu Tumores benigni in *Scirrhus*, *Scirrhi* in Cancros immutantur. Partes Cautistici, cujuscumque sit speciei, per apertas vulneris venas receptæ in sanguinem, venenatam ipsi qualitatem inducunt, *Arsenicalia* præsertim, quibus semel tantum applicatis, plurimi convulsi fato occubuere. Unum postremò observabimus circà eos Tumores qui versùs radicem quasi in collum arctantur. In iis, quæ collum pertranscunt vasa exiliora sunt, crassissima verò & varicosa quæ in Tumoris molem disperguntur. His ergò apertis, difficiles oriuntur *hemorrhagiæ*, quæ quidem, si Cautistica adhibeantur, vitari nequeunt: quippe cum iis, vulgò à Tumoris mole, ad radices pergendo, iteratis vicibus proceditur; at si culter adhibeatur, statim à radicibus Tumor potest excidi.

*Ergò qui Tumores deleri debent, Ferro potiùs, quàm Cauterio potentiali, delendi.*

DOMINI DOCTORES DISPUTATURI.

<i>M. Jacobus - Franciscus le M.</i>	<i>Petrus Lalouette,</i>	<i>M. Franciscus Mery, utrin-</i>
<i>Chat de la Sourdiere.</i>		<i>que Pharmacia Professor.</i>
<i>M. Joannes - Franciscus Isez.</i>	<i>M. Petrus - Josephus Mac-</i>	<i>M. Joannes - Baptista du</i>
	<i>quer, Regia Scientiarum</i>	<i>Bois, Professor Regius Eme-</i>
	<i>Academia Socius.</i>	<i>ritus.</i>
<i>M. Carolus - Franciscus Bou-</i>	<i>M. Josephus - Maria - Fran-</i>	<i>M. Guillelmus - Josephus de</i>
<i>signy des Preaux.</i>	<i>ciscus de la Sône, Censor</i>	<i>l'Epine, Exdecanus, &amp;</i>
	<i>Regius, &amp; Regia Scientia-</i>	<i>Academia Censor.</i>
	<i>rum Academia Socius.</i>	

Proponebat Parisiis A N N A - C L A U D I U S D O R I G N Y, Parisinus;  
Saluberrimæ Facultatis Medicinæ Parisiensis Baccalaureus, A. R. S. H.  
1750, à sextâ ad meridiem.

---

Typis QUILLAU, Universitatis & Facultatis Medicinæ Typographi, 1750.